




SERVISIO METEOROLÓGIKO ANTIANAN HULANDES I ARUBA

Seru Mahuma z/h, Kòrsou, Antianan Hulandes
Tel: +599 9 839.3366 Fax: +599 9 868.3999 E-mail: cur-met@meteo.an

KOMUNIKADO PA PRENSA

SÈPTÈMBER 2009: TIKI ORKAN I GENERALMENTE SEKU

Despues di un ougùstùs ku bastante aktividat, e luna ku normalmente ta esun mas aktivo di temporada di orkan (sèptèmber) tabata bastante trankil. No mas ku tres siklon tropikal a forma luna pasá i solamente un di nan, *Fred*, a alkansá forsa di orkan. Pa loke ta toka Antianan Hulandes i Aruba, tormenta tropikal *Erika* tabata di importansha ora ku menasa di e sistema aki a hasi nesario pa emití un *Tropical Storm Warning*.



Mayoria áwaseru relashoná ku *Erika* tabata situá ost di e sentro i sùitost di Islariba.
Fuente NRLMRY

Meskos ku tormenta tropikal *Ana* medio ougùstùs, tormenta tropikal *Erika* tambe a debilitá ora ku e sistema aki tabata aserkando parti nortost di Área di Karibe. *Erika* a forma durante di anochi di promé di sèptèmber i tabata kousa un bientu fuerte na Islariba ora ku e tabata aserkando parti ost di Área di Karibe. Durante di mainta di 3 di sèptèmber, sentro di *Erika* a pasa sùit di Saba na un distansha di mas o ménos 70 kilometer. No a registrá bientu ku forsa di tormenta na ningun parti di Islariba. Prinsipalmente ost di sentro di *Erika* tabatin algun área di áwaseru fuerte ku sin embargo tabata debilitá sigun ku nan tabata yega mas serka di Sint Maarten, Sint Eustatius i Saba. E mesun atardi, *Erika* a debilitá bira un disturbio suak i a kanselá e *Tropical Storm Warning* e or'eí.

Tantu Orkan *Fred* komo Depreshon Tropikal *Ocho* a desaroyá den bisindario di Islanan Kabo Bèrdè. *Fred* a forma dia 7 di sèptèmber i dos dia despues tabata brèvemente (mitar dia) un orkan di kategoria tres. Pronto bientunan desfavorabel na nivelnan haltu di atmósfera a sòru pa e sistema aki debilitá rápidamente.


Depreshon Tropikal *Ocho* a forma dia 25 di sèptèmber i a pasa, sin bira un tormenta tropikal, pa historia denter di 24 ora pa e mesun motibu ku *Fred*.

Áwaseru:

Durante di luna di sèptèmber 2009 wer riba Islanan ABC tabata generalmente seku. Durante di anochi i mardugá di 15 pa 16 di sèptèmber sin embargo, un sistema di áwaseru i welek ku bos ku tabata forma parti di un disturbio mas grandi, a amplia su mes for di parti nort di Venezuela den direkshon nortwèst. El a kousa banda di 12'or di anochi prinsipalmente na Boneiru i Kòrsou un bientu fuerte for di direkshon sùit, kompañá pa un bahada remarkabel di temperatura. Mayoria di áwaseru, ku e sistema aki a kousa, sin embargo a keda riba laman. Pa e motibu aki wer a keda generalmente seku na Kòrsou, miéntras ku na Boneiru e kantidatnan di awa ku a ser midí tabata por lo general ménos ku 5 mm. Durante di atardi di 16 di sèptèmber i e siguiente mardugá a kai algun áwaseru, kompañá pa welek ku bos riba vários parti di Aruba. Mainta di 17 di sèptèmber a midi na Oranjestad (Ponton) un kantidat di 28.5 mm di áwaseru.

Un siguiente sistema di áwaseru i welek ku bos a forma durante di anochi di 27 di sèptèmber riba parti nort di Venezuela. E sistema aki lo a bai sòru durante di e siguiente mardugá i mainta pa muchu mas áwaseru riba espesialmente Boneiru. A emití na e momentu ei un Atvertensha pa Áwaseru Fuerte pa Boneiru. Na Kòrsou tambe, prinsipalmente parti pariba di e isla a risibí bastante áwaseru (lokalmente mas ku 25 mm). E aparato di midi awa na Flamingo Airport na Boneiru a registrá riba e dia ei un kantidat di 71.8 mm, miéntras ku riba otro partinan di e isla aki tambe a midi kantidatnan basta grandi di áwaseru. Aruba a keda generalmente seku riba e dia aki.

Sèptèmber a terminá ku un total di 72.9 mm na airopuerto di Boneiru, loke ta kasi dos biaha mas tantu ku e promedio pa e luna aki (37.0 mm). Na Airopuerto Hato e total pa luna tabata apénas 13.7 mm loke ta 72% bou di e promedio di 48.6 mm. No ménos ku 98% di e total di áwaseru aki a kai durante di mainta di 28 di sèptèmber.



Ademas di e áwaseru ku tormenta tropikal *Erika* a kousa na prinsipio di luna, tabatin tambe un ola tropikal ku a kousa especialmente durante di atardi di 19 di sèptèmber bastante áwaseru riba Sint Maarten. Mainta di dia 20 a midi 23.2 mm na Princess Juliana Airport. Apesar di esei, sèptèmber 2009 a terminá na e airopuerto aki ku un total di áwaseru di 83.7 mm, loke ta 40% bou di e promedio di 139.6 mm.

Perspektivanan pa áwaseru riba Islanan ABC pa lunanan òktober te ku desèmber 2009 ta keda práktikamente sin kambio. Último pronóstikonan ta indiká ketu bai ku e chèns pa un temporada normal òf mas seku ku normal pa e islanan aki ta 75 pa 80%. Pa Islariba ta sigui antisipá un kantidat normal p'e mesun periodo aki.

Imágen di radar di djaluna 28 di sèptèmber, 6:45'or, ora lokal, ku ta muestra un área grandi ku áwaseru fuerte kompañá pa welek ku bos sùit di Boneiru. E áwaserunan aki a move di sùit pa nort.

Manera ta kustumber, Servisio Meteorológiko lo sigui desaroyo di sistemanan tropikal ku hopi atenshon. Den kaso ku esei ta nesesario lo emití atvertensha na outoridatnan i pueblo di nos islanan.